

Dimapur nung nüburtem saksalemtsü mapang tongogo: DALT

Dimapur, Aami/June 26 (TYO): Murgipatti, Dimapur nung June 26, 2025 nü Meyi Jamir aonsotsü aliba mapang non-local shishilempar temi meshidaki amshiba khukhua aitsür, ta Dimapur Ao Lanur Telungiem (DALT) sangdong ka ajanga ashi.

Iba ama tashiyim mapa inyakba ya aremzüksü makokba kisüing masü saka non-local nisungtemi nüburtem shishilempadak tesemtem amokbangba yimya tali jangjatsüba tatalokba ka lir.

Dimapur nung shishilempadak tesem ajunga non-local nisungtemi amokbanga kumogo. Aser tebilemtsü tulutibaji, parnoki asen nübur dak teka sangshitsü tasü aitba ya lir. Item tatalokba ya ajanga local nisungtemi pei tasoli

nung pei temeden bena arutsü nüngdakba sayur.

Non-local shishilempar ajunga ILP özüing agi alena lir aser özüing, rongsenketzüing mesüra yimya balala agi aibelenba tatok magütsütsü. Onoki özüing amshir aser district administration dang mapang shidak nung iba ama lendong majurutsü asoshi mera agitsü ayongzüker, ta DALT ajanga ashi.

Maneni nüburtem aser lokti tentet balala dang iba ama özüing alema tashiyim amshiba anema ola adoktsü ayongzüker. Asen temeden asoshi saksalema aser lungjema alitsü mapang tongogo aser onoki Dimapur nung Naga nunger lisopur tejangraba aser temeden wazüka ayutsü akang-akanga nokdaka lir, ta sangdong ajanga ashi.

State levele RMNCHA+N orientation training tenzüko

Dimapur, Aami/June 26 (TYO): RMNCHA+N (Reproductive Maternal Newborn Child and Adolescent Health + Nutrition) indang state level review meeting cum orientation sentong anogo ana asoshi IDSP Hall, DoHFW nung June 25, 2025 anogo tenzüko.

Iba sentong ya Dr. Avile Zao, Mission Director, National Health Mission, Nagaland mendenpula sür agi, kong pai DPOs - RCH/ UIP (District Program Officers Reproductive Child Health Officers/ Immunisation), DPMs (District Program Manager) aser Block Program Managers tem den jembidang, DPOs (District Program Officers) aser DPMs tem asoshi district nung NHM mangdang takok ngua bener aotsü

kanga tasak lir, anungji item health indicators tajungba kumdaktsütsü asoshi tali bendanga agütsür inyaktsü ayongzüka liasü.

District balala nungi arua iba sentong nung adener pela agizükba o jembidang, Dr. Khelito Zhimomi, State Program Officer, RMNCHA+N ajanga district balala tsüngta inyakyim tajungtem lemsatapa angazükteptsü ayongzüka liasü.

Parnok ya RMNCHA+N indang tongtipang component, talisa high risk pregnancy, anaemia, SUMAN, Laqshya, Musqan, Maternal Perinatal Child Death Surveillance and Response (MPCDSR), Family Planning aser Child Health kübok tongtipang component indang shisa lemsateptsü.

Nagaland nung temesepba mozü amshir lakh 6 dak tema lir

Kohima, Aami/June 26 (TYO): State nung temesepba mozü amshir nisung 6.24 lakh dak tema lir aser public health emergency tia ajurutsü anameta nung lir, anungji iba tebilemtsü azüoktsü asoshi stakeholders ajungai teka amteper nokdaktsü nüngdaker, ta sorkar ketdangsür kati Brehostibarnü ashi.

Peren district kübok Operation Salvage (OS), Heningkunglwa village nung International Day Against Drug Abuse and Illicit Trafficking anogomung sentong akhumdong ama jembidang, Union Ministry of Social Justice & Empowerment ajanga 2021 survey agiba nung Nagaland nung temesepba mozü achi-ajemer nisung 6.24 lakh lir aser yangji tanur 1.11 aser tetsür 26,000 lir ta bushitet, ta Y. Kikheto Sema, Principal Secretary of Law & Justice and Fisheries & Aquatic Resources ajanga ashi.

Ibai state nütsüing yongsük shilem 31 jungnüa lir, anungji India nung 'injecting drug users' timtiba aliba state ter rongnung Nagaland dena lir, ta pai ashi.

UN General Assembly indang 1987 pangzüing nung June 26 ya temesepba mozü anema nokdakba anogo asütsü sangdong aser 2025 omen "Breaking the Chains: Prevention, Treatment, and Recovery for All!" ajanga temeim sayua, kuli tejanga nung ajemdaker anepalutsü aser ajak yaritsü ayongzüker, ta Sema-i ashi.

Alima nung nisung 30 crore

dak temai temesepba mozü amshir. India nung temesepba mozü amshiba agi kongshir nisung 7.21 crore aser injecting drug users 8.5 lakh lir. Nagaland kisüing nunga injecting drug users 40,000 lir aser heroin ya timba amshir, ta pai ashi.

Ano yi ya tebilemtsü tuluka lir, aser Nagaland nung Nagaland Liquor Total Prohibition Act of 1989 liaka nütsüing yongsük shilem 8.1 mesüra nisung 3.62 lakh-i yi ajemer, ta Principal Secretary Y. Kikheto Sema-i ashi.

Iba tebilemtsü koktettsü asoshi resources peria meliaka state sorkari law enforcement, rehabilitation aser public awareness agüja kanga meranga inyaktar, ta ashi.

Ajisüaka temesepba mozü state telungi aitba nungi kumzüksü asoshi tasa tajung yanglua ajak lungjemer inyaktsü ayongzüka liasü, kechiaser Nagaladn ya Myanmar aser Manipur den arütsü lir, aser tesem anaprong ya temesepba mozü shibelenba lenmang tongti lir.

Tesem anatsülen Naga nunger aliba ajanga arütsü atsüdangtsü tasak, anungji arütsü külem-len aliba nüburtem lungjemer inyak nung ajungtsü, ta pai ashi.

Ano Khristanpur timba aliba state ka asünungji arogo temia shilem tali agia temesepba mozü amshiba nokdangtsüla aser awareness agütsütsüla, ta Sema-i ashi.

Naga nunger lokti nung arogo ya kanga tongtipang lir, anungji parnok indang Sunday schools, lanur telok aser lokti ajunga

adenshiba sapang amshia nüburtem nem temesepba mozü ajanga lendong bener arutsüba indang angatetdaktsütsüla, ta ashi.

Iba tebilemtsü azüoktsü asoshi kibong, medemer aser yimer-yimsanger teinyaktsüa lir.

Temesepba mozü amshiba nungi jenbua alitsü ya kilong nungi tenzüker, kong sensaksem akatsü kanga tongtipang lir, ta ashi.

Pai temesepba mozü achi-ajemer tem dang, "Nai Tsüngrem aser ner tsürabor tsüngta züngzüktepba ya nü arishi tepiyong amshitsüla. Asenoki temesepba mozü maliba Nagaland kumdaktsütsü asoshi sentong yanglua inyakti," ta pai ayongzüker.

Iba sentong nung temesepba mozü amshiba nungi taneptsü ngur alir A. Anato Swu-i pa indang takum kuli lemsatapa liasü.

Mapang ka Swu ya MBBS azünger tajung ka liasü, aser mezüing küm ana nung pai marks tajung ngutetaka küm tasembuba nung mozü lar akum. Iba yongji pa mezüingteti course matemdang kidangi meyipa shilangtsüsa akum.

Ajisüaka pa otsü yangji matem. Swu taneptsü anguba sülen kaket ken o zülur tajung ka akum.

Counsellor, OS, Vini Zhimomi-i anir sentong nung adener temi lungjemer temesepba mozü anema nokdaktsü aser iba timtem agi kongshia alirtem yaritsü nangzüktepa liasü.

Temesepba mozü anema raratsü arok khuret: Moatoshi Longkumer

Dimapur, Aami/June 26 (TYO): Küm shia alima nung International Day against Drug Abuse & Illicit Trafficking ya June 26 nü amunger, aser iba anogo yagi temesepba mozü ajanga teraksa tulu bener arutsüba indang kisüing masü saka arok lungjemer mera tajung agitsü nüngdaka aliba indang nenshitsür, ta Advisor, Labour, Employment & Skill Development, Excise, Moatoshi Longkumer-i sangdong ka ajanga ashi.

National Library of Medicine (NLM) ajanga survey ka agiba nung, India nung nütsüing yongsük 1.4 billion shi aliba nungi nisung 8.75 million-i cannabis amshir, million anati opiates amshir aser 0.6 million-i sedatives mesüra hypnotics amshir ta asadangteta lir.

Ano The Times of India nungi osang ka ajanga ashiba agi, nisung crore 25 jungnüa addiction tongpang nung nokdaka lir aser yangji nisung 4 crore dak tema 'fully dependent' aser crore ana jungnüai injecting drugs

amshir. Taoksatsükaji, item rongnung shilem 13 shi arishi küm 20 tekübok, aser addiction aliba nisung ter nungi 9 bo arishi küm 18 majungdang nungi temesepba mozü amshi tenzüik ta shia lir, ta Longkumer-i ashi.

Ajidang masü 2022 küm study ka agiba nung 2017 aser 2019 tsüngta India nung nisung 2300 dak tema drug overdoses agi asüba liasü aser parnokji arishi küm 30 nungi 45 tsüngta timba liasü.

Nagaland sasap indang reprangdangra, national level survey report ka 2019 nung adokba nung state nung temesepba mozü amshir nisung 6,24,000 shi lir aser item rongnung tanur 1,11,000 aser tetsür 26,000 lir ta shia lir.

Asen state asoshi temesepba mozü tebilemtsü ya statistic kisüing masü saka asangsang nung asenoki ajangshiba tebilemtsü tulu ka lir, koba ajanga asen kibong nung kongshir, tarutsü tia raksatsür aser asen nübur tesendaktep tanem-tanem

sama ao, ta pai ashi.

Aser iba tebilemtsü ya özüing amshirtem kisüing abentsüla masü, saka asenok ajaki lemsatapa abentsüla. Police aser anti-narcotics units temi maneni kanga meranga shibelener pua aser supply chains raksatsür, saka parnok mapa ya solution nung shilem ka lir. Temesepba mozü anema shidakba rara ya ka mela-mela tenzüker, aser aji kidang, school nung mesüra tamangba yimsü aser lokti tentet balala lir.

School aser college tem ya academic atema kisüing masü saka yangi tanur ka takum yanglushia aniteter, aser temesepba mozü anema raraba nunga tongtipang 'line of defence' ji lir. Kaketshir kati temesepba mozü amshi tenzükbaji tashi mangaba nungi kisüing masü, anungji kaket reju temi curriculum alema oa item timtem angateta yaritsüla, ta Advisor Moatoshi Longkumer-i ashi.

Anti-drug awareness

programme, counselling services aser mental health education amala agütsütsüla.

Tesayur temia tongtipang shilem agitettsü, kechiaser kaketshir ka yimya melenshiba parnoki mezüing ajiteter. Anungji training aser teyari shidak lira, parnoki kaketshirtem tajungba lenmang nung anitettsü, ta ashi.

Asenok ama arogo tiyong sür aliba state nung anogoshi takum yimya tem tamangba yimsü nung tera yanga lir. Arogo temi nüburtem ajungmesotsüla aser khuret abentsüla. Temesepba mozü achiba ya temang mesüra tekolok indang timtem kisüing masü, tanüla tsütsüa lir. Anungji arogo temia tasü ita nokdaktsüla aser iba mission nung temeim alitsüla, ta pai ashi.

Tekülem kidang sapang nungi temesepba mozü tebilemtsü indang jembia, lanurtem nem mentorship agütsüba aser 'recovering addicts' den telemsa makai yaritepra, arogo temi takum jenti melenshitsütsü.

Maneni Nagaland nung police

aser danga sorkar agencies temi "War against Drugs" tenzüko aser iba rara nung nübur ajungai shilem agitsüla. Iba tebilemtsü koktettsü asoshi inyakba nung timtem tulutiba ronung ola madokba ya ka lir. Kibong temi maksü tsübor, kidanger temi balaka nung repranger aser lokti-i senzüka yutsür. Ajisüaka temesepba mozü yagi kibong mashi kati aittsü akoker, takum mashi nung kongshir ta asenoki angatetsüla, ta Advisor Moatoshi Longkumer-i ashi.

Anungji nisung ajaki shilem agitsü lir. Özüing alema inyaksangshiba osang agütsüba süang, taneptsü anguba nung kar yariba süang, mesüra temesepba chiyongtsü nem kokdaktsür ama bilema alir den ochi mulungsentsü agi sensaksemtsüa süang.

Temesepba mozü anema raraba ya özüing alema shibelenba anendaktsütsüba kisüing masü. Anungji nübur ajungai yariteptsüla aser özüing amshiba ama awareness aser rehabilitation ya tongtipang lir, ta paisa ashi.

District balala nung International Day against Drug Abuse & Illicit Trafficking anogomung amung



Dimapur



Niuland

Dimapur, Aami/June 26 (TYO): International Day against Drug Abuse & Illicit Trafficking 2025 amungba anogo Mokochung nunga June 26 nü District-level Nasha Bharat Abhiyan Committee, Mokochung-i ayongzüka Deputy Commissioner's Conference Hall, Mokochung nung sentong ka agiogo.

Sentong nung Sr. Specialist, IMDH, Dr. Kilangwapang-i "Breaking the Chains: Prevention, Treatment and Recovery for All" omen nung ajemdaker jembia aser Watsu Mungdang tir, Tianaro Jamir aser Vice-President AKM nungeria o tatsütsü jembia liasü. Maneni recovering addict Rongsen Jamir-i pa taküm kuli lemsatop aser Imkum Ozukum-i ken tajung ka aten.

Sentong nungsa Deputy Commissioner, Mokochung, Ajit Kumar Verma, IAS aser Superintendent of Police, Mokochung, Vesupra Kezo, NPSc natia o jembia liasü.

Niuland nunga District Administration aser Niuland Police, Social Welfare Department aser CAD Foundation nung longjemer June 26 nü International Day against Drug Abuse and Illicit Trafficking sentong ka ayongzüka agiogo. Iba sentong ya "Breaking the chain: Prevention, Treatment, Recovery for All" omen nung ajemdaker Clock Tower, Niuland Town nung agia liasü.

Omen dak sendakba nung Director CAD Foundation, Limhathung Ezung-i tongti o jembir ama jembiba mapang, temesepba mozü dak sendakba

nung talenba salatsüba ya kanga tongtibang onük ka lir aser iba atema Arogo, lokti lenirtem, tsürapurtem, lokti tentet balala aser sorkar agency tem longjem inyaksüla ta ashi. Ezung-isa, iba ya kodaser nokdangtsü, mozü achirtem mesenmetui amshiba anentsü aser tangazükba balala agütsütsüba indang jembia liasü.

ACP Niuland, Nokin Longkumer aser Medical Officer CHC Niuland, Dr Rosemary natia o tatsütsü jembia liasü.

Aviho Achumi shiba tang CHC Niuland nung OST treatment agidar, pai ajak ajungmesoa pa taküm kuli agütsü aser Amenli Yephthomi-i ken tajung ka aten. Iba sentong ya EAC Niuland, Vitoka Yephthomi lenisüba nung agi aser paisa tepela o jembia liasü. Pastor SBAN, Kughavi Zhomi aser pastor NCRC Niuland, Puloto Sheqi nati tetenzük aser tatembang sarasadem agi.

Kasa mapang nung Meluri nunga International Day against Drug Abuse & Illicit Trafficking sentong ka takok ngua agiogo. Iba sentong ya District Administrative Department aser Social Welfare Department, Meluri na longjemer Meluri Town hall nung agia liasü.

Sentong nung o jembiba mapang Deputy Commissioner, Meluri, K. Mhathung Tsanglao, NCS-i, tanü lanurtem temesepba mozü achitsüba tatidang nung tsütsü ana nung lir, koba ajanga parnok health dak dang kongshiba masü saka kibong aser lokti daka kongshir, ta ashi.

SDPO, Meluri, Dr. T. Desela Sangtam, NPS aser Medical officer, CHC Meluri, Dr. Kelelo

Pradia nati Drug Abuse & the Law, aser Commonly Abused Drugs & Opioid Substitution Therapy dak sendakba nung power point presentation agüja liasü.

Iba sentong ya EAC Meluri, Pipfusa Pojar lenisüba nung agi aser ketdangsurtem, anganwadi worker tem, Meluri jila nung alirtem, MSK züngsemtem aser NGO balalai sentong nung shilem agia liasü.

June 26 nü alima ajunga den jangyu medema Tseminyu nunga Nasha Mukht Bharat Abhiyan International Day against Drug Abuse & Illicit Trafficking sentong agiogo. Iba sentong ya Baptist Higher Secondary School indang Auditorium Hall, Tseminyu nung agi aser Deputy Commissioner Tseminyu, Japheth Woch (NCS) alakteta jaoker liasü.

Sentong nung department balala indang officer tem, kaketshirtem aser lanurtemi shilem agia liasü. Sentong nungsa Tseminyu ya temesepba mozü nungi pila aliba district ka kümdaktsütsü nangzüktepba liasü.

Sentong ya EAC Tseminyu, Molosangla Ozukum lenisüba nung agi aser Additional Deputy Commissioner, Tseminyu, Kikumsangla Jamir (NCS)-i o jembia aser CDPO Tseminyu, Menokhrielie-i tepela o jembia liasü.

Tuensang nunga International Day against Drug Abuse and Illicit Trafficking ya Town Hall nung agiogo. Iba sentong ya Department of Social welfare Tuensang, Addiction Treatment Facility and Opioid Substitution Therapy aser District Hospital

Tuensang nung longjemer ayongzüka aser Deputy Commissioner, Lithrongla Tongpi Rutsa alakteta jaoker liasü.

Sentong nung o jembiba mapang Lithrongla Tongpi Rutsa-i district nung temesepba mozü achiba anema longjemer raratsü ayongzüka liasü. DC-isa, district ya temesepba mozü achiba nungi pila toktsütsü atema NGO, Arogo aser kaketshir lokti tentettem dang longjemer inyaksü ajungshi.

Maneni Mon nunga Brehostibarnü International Day Against Drug Abuse and Illicit Trafficking sentong ka Town Council Hall nung ayonzüka agiogo. Iba sentong ya "Breaking the Chains: Prevention, Treatment and Recovery for all" omen nung ajemdaker agia liasü.

Sentong nung o jembiba mapang Deputy Commissioner Mon, Wennyei Konyak, NCS-i, temesepba mozü achiba ken o ya Nagaland aser India nung dang masü saka alima ajunga nung teblemtsü tulu ka lir, ta ashi. Paisa, iba anema kija aser lokti tentet ajak longjemer inyaksü ajungshi.

Sentong nung OST Counsellor, Mon, Ingaupule Thou-ia o tatsüka jembia aser ashiba agi iba anogo ayongzüka amungba ya alima ajunga temesepba mozü achiba nungi pila alitsü atema nükjidong aliba ataloktsü nükjidong nung amunger.

ASI, SP Office Mon, Latwang-ia pa tajangshiba lemsatop aser KNSK-i, ajak longjemer temesepba mozü achiba anema raratsü ayongzüka liasü.

Sentong ya EAC, Mon, Er. R. Mhao Humtsoe lenisüba nung agi, Yangman Konyak-i ken ka aten aser SDO (C), Mon, Ajit Kumar, IAS-i tepela o jembir tembunga liasü.

Linük ajunga den külemi Dimapur nunga June 26 nü 'International Day Against Drug Abuse & Illicit Trafficking' amogomung 'Breaking the Chains: Prevention, Treatment and Recovery for all' omen nung ajemdaker IRCA Prodigals' Home nung mungogo.

Iba sentong ya Integrated Rehabilitation Centre for Addicts, Prodigals' Home aser Social Welfare department, Nagaland, Narcotics Control Bureau, Prodigals' Home aser NCORD nung longjemer ayongzüka liasü.

Sentong nung o jembiba mapang Prodigal Home, Director K. ELA-i, temesepba mozü achiba ya tashidak ka dang masü saka humanity anema tsükchir den rara ka lir, ta ashi. Laisa, asen lokti nung temesepba mozü achiba anema department mesüra lokti tentet kari dang masü saka ajaki raratsüla ta ashi.

Sentong nungsa Senior Inspector, Social Welfare department, Shikato Jimo-i, 'Breaking the Chains: Prevention, Treatment and Recovery for all' omen nung ajemdaker jembia.

Maneni Dimapur District Users Network (DDUN), Superintendent, NCB Dimapur Field Unit, . Lhunkholal, Narco Co-ordination Centre Dimapur (NCORD) aser Counselor, IRCA Prodigals' Home nungeria o tatsütsü jembia liasü.

Süngratsü nung teka mapa inyaksü aser aluyimba yimya balala tesayuba aka



Mokokchung, Aami/June 26(TYO): Süngratsü Kaketshir Telongjem-i(SKT) ayongzüka June 24 aser 25 nü "Self Reliance" ta asüba omen nung ajemdaker Arju Centre Süngratsü sentong kübok lanurtem aser kaketshirtem teka mapa inyaka ibaji ajanga sobaliba angazüktsü aser tsünüsempongtsü balala tsünütsü aser item mapatem nungi tajangzük ngua taküm alitsü asoshi tangazükba ngua iba sentong kanga dang takok

ngua agiogo.

Mezüng nü June 24 nü Senden Salang, Süngratsü nung agi aser iba anogo aou aser süng agi osettsüset balala yangluba mapang agi aser iba den ano tsürabur mapang nung Arju aser Tsüki nung atalokba otsüolemtem aser ken balala tesayuba agütsü.

Tanünü June 25 nü Yimchalu nung aluyimba aser shiruru metsüba yimya balala tesayuba Krishi Vigyan Kendra (KVK), Yimsemyong, Mokochung

nungi mongintem ajanga agütsü.

Iba tesayuba sentong mezügnü K Zulu Lemtur, Nokenwapang Ozukum, Imolila, Mejongsangla, Alisoa Aier, Shilutemsu Walling, Rediwapang, De Temjensangla Pongener, Chubayondang Walling, and Takawati Walling paqrnoki tesayuba balala agütsü aser tanünü Village Council Chairman, Yimchalu C Wati Walling aser Dr. Sarenti from KVK Yimsemyong tenati agüja liasü.

SCERT nung graduation day mungogo



Dimapur, Aami/June 26 (TYO): School Counseling dak sendakba nung küm ka Diploma agir 2024-25 batch atema graduation day June 26 nü SIEMAT hall State Council of Educational Research & Training (SCERT), Kohima nung agiogo.

Iba anogo ajak senteper kaketshir ti nem graduation certificates agüja liasü.

Sentong nung lokti pela agizükba o jembiba mapang Director, SCERT, Keviraleu Kerhuo-i graduate asür ajak nem parnok takok tajung asoshi tenütsang agütsü aser parnok dang aremzüka meranga

inyaksü aser renloka aotsü ajungshia liasü. Laisa, tetsükdaktsü ajak tem agizüka pei anisüngzüka aliba tesem toktsür lokti anitsü atema tejakdangi aotsü ajungshi. Maneni lai graduates tem dang angazüktsü atema teti jangrabangra alitsü ajungshia liasü.

Research Associate, SCERT, N.Rose Kithan lenisüba nung iba sentong agi aser graduation speech ya 2024-25 batch trainee Thungbemo aser Hungngaule nati jembia aser Jt. Director, SCERT, Dr. Zavise Rume-i tepela anküp o jembia liasü.

SCO Summit: Rajnath Singh-i külem sangdong nung sign masü



June 26, 2025 nü China kübok Qingdao yimti nung ayongzükba Shanghai Cooperation Organisation (SCO) Defence Minister tem senden nung Defence Minister, Rajnath Singh den tangartem tangokba noksa nung angur.

New Delhi, Aami/June 26 (Agencies): Brihostibarnü China kübok Qingdao yimti nung ayongzükba Shanghai Cooperation Organisation (SCO) Defence Minister tem senden nung Defence Minister, Rajnath Singh-i SCO külem sangdong ka nung sign asütsü memelung.

Kiralongra aser region nung security densema India nunger atema kanga tongtibang onük aika nung kongshitsü asüba agi pai iba sangdong nungji sign masü.

Iba document nungji kiralongrartemi Jammu & Kashmir kübok Pahalgam amakba indang shia mali, ajisaka Balochistan nung telungpurtem indangbo shia lir.

Pakistan-i aiben India-i Balochistan-i nüchiso bushiba maparen pusemer ta India aija lir.

Tesülen SCO defence minister temi kiralongra onük

nung tebilemba balala aliba agi külem sangdong ka magütsütsü telemtetba agi.

China nung ayongzükba SCO senden nungji SCO nung China, Russia, Pakistan aser India densema linük ter nungi defence minister tem aden. Iba senden nung region nung yimjung aser security atema jembiba den külemi kiralongra anema amalitepa raratsü aser züngsem linüktem tsüngda sepaitem amalitepa inyaktsü atema jembi.

Senden nungji Rajnath Singh-i linük kari kiralongraba ya hadir ama amshir, ta aitsü.

Paisa tawa Pakistan nung amenoka aliba Lashkar-e-Taiba kiralongrar teloki Pahalgam amakba metetdaksü.

Kiralongra anema raraba nung atsü-anem kecha malitsüla, anungji ajaki longjemmer kiralongra

pusemertem aser anitetertem anema raratsüla, ta pai ashi.

Pakistan aitsüba olen ka nung Singh-i, "Linük karibo arrtsü adener kiralongraba ya linük mapatong indang hadir ka ama amshir aser kiralongrartem jenokdaksür. Item ama linüktemji aitsütsü atema SCO-i marendaksüla," ta ashi.

Paisa, yimjung aser azükaru naji kiralongra den külemi aotsü makok, anungji SCO züngsem linük ajaki longjemmer kiralongra tebilemtsü anema raratsüla, ta ashi.

2023 küm nunga SCO senden nung China nunger Belt & Road Initiative pusemba document ka nung India-i sign masü.

2020 küm Galwan Valley nung China aser India sepaitem tsüngda raraba sülen tang mezüng defence minister Rajnath-i China semdanger.

Air India tayimtsü indang Black box nungi data download süogo

New Delhi, June 26 (Agencies): June 12 nü Ahmedabad nung tsükokba Air India tayimtsü indang black box nungi data download süogo, ta sorkar ketdangsertemi metetdaksü.

Brihostibarnü Aviation Ministry-i, "Data ji tang bushisüngdangdar. Iba lendong ataloktsüsa tatalokbatem kuli jangjatsü aser tarutsü nungbo item ama lendong mataloktsü atema inyaktsü nükjidong nung bushisüngdanger," ta metetdaksü.

Ministry-isa, "June 24 nü nikongdang DG Aircraft

Accident Investigation Bureau leniba nung team ka aser (America nunger) National Transportation Safety Board (NTSB) nungi technical mongintemi black box nungi data agizükba maparen tenzüka liasü. Black box tejaklen nungi 'crash protection module' (CPM) agizükogo aser June 25 nü memory module ji agizükteta AAIB lab nung data agizükogo," ta metetdaksü.

Parnokisa, AAIB-i bushisüngdangba maparen tenzüker aser lateta aliba inyakyim nung ajemdaker June 13 nü

multidisciplinary team ka tenteta liasü, ta metetdaksü.

International inyakyim nung ajemdaker iba team nung lenirji DG AAIB lir. Team nung züngsemtemji aviation medicine specialist ka, ATC officer ka aser USA sorkar indang bushisüngdangba agency NTSB nungi züngsemtem lir, ta parnokisa metetdaksü.

June 24 nü front black box ji AAIB Lab, Delhi tonga bener oa liasü aser tesülen aliba black box ji AAIB team-i ghonda ishika tsüngda AAIB Lab, Delhi tonga ao.

'One Nation, One election' atema tentetba JPC senden amentsü

New Delhi, June 26 (Agencies): One Nation, One Election atema tentetba Joint Parliamentary Committee (JPC) senden July 11, 2025 nü Parliament House Annexe nung amentsü, ta ketdangsertemi metetdaksü.

JPC nung tongti, BJP MP PP Chaudhary leniba nung committee züngsemtemi legal tsütsü mongintem aser taoba mapang ketdangsertem den shisa lemsateptsü.

Constitution (129th Amendment) Bill, 2024 aser Union Territories Laws (Amendment) Bill, 2024 asadangtsü atema JPC-i stakeholders aika den senden mena arudar.

India nung Lok Sabha election aser state assemblies election mapang ka nung dang külemi agitsü nükjidong nung One Nation, One Election atema bill temji yaküm December ita nung Lok Sabha nung benoka liasü.

Iba asalentong kübok 2029 küm mezüng shimba assemblies ji Lok Sabha kümsük den külemi küm pongu kümsük tembanga alitsü aser 2034 küm nungbo election külemi agitsü.

Tamalen PP Chaudhary-i, Uttar Pradesh densema 2032 küm shimba assemblies jibo

kümsük tatsüba kümtsütsü aser Lok Sabha election den külemi election agitsü, ta metetdakja liasü.

"2034 küm Lok Sabha election den külemi election agitsü atema assembly balalaji kümsük küm ana mesüra asem tashi atsüzüksüa akok," ta Chaudhary-i ashi.

Züngsem 39 aliba committee nung züngsemtemji Lok Sabha nungi MP 27 aser Rajya Sabha nungi MP 12 lir. Iba committee nung BJP nungi Anurag Thakur aser Bansuri Swaraj na, Congress nungi Priyanka Gandhi Vadra aser Manish Tewari na aser NCP nungi Supriya Sule nunger-a densema lir.

Tang tashi nung committee-i Maharashtra aser Uttarakhand na semdangogo aser maneni states aser Union Territories aika semdangba sülen parnoki report renemtsü.

Sorkari ashiba agi, linük nung Lok Sabha aser state assemblies election külemi dang agiba ajanga senotsü aika kümzüksü.

Ajisüaka opposition party tem densema aikati, election ajak mapang ka nung dang agiba ajaanga India nunger federal inyakyim aser state tem nija tashi kongshitsü, ta ashir.

India nunger ISS nung mezüng tetsüng ajemoksangji Shukla kümogo

New Delhi, June 26 (Agencies): Axiom-4 (Ax-4) mission kübok Florida nung aliba NASA indang Kennedy Space Centre nungi rocket- SpaceX Dragon spacecraft khaketsüba sülen ghonda 28 nung International Space Station (ISS) atongba ajanga Group Captain Shubhanshu Shukla-i otsü tasen ka yanglua India nunger astronauts rongnung mezüngbuba ISS nung tetsüng ajemoksangji pa kümogo.

Küm 41 tejaklen 1984 küm India nunger rongnung mezüng space-i atusangji Rakesh Sharma liasü. Küm 41 tejaklen (1984 küm) India nunger Rakesh Sharma-i mezüng Soviet Russia nunger Soyuz spacecraft nung space-i tua puti otsü tasen ka yanglua liasü; iba sülenbo tang India nungeri space tsütsü ano otsü tasen yanglur.

Shukla den astronaut asem International Space Station telungi aidang idakji alirtemi parnok pelaa agizük.

Iba mission nung pilot Shukla

den tangar asemji US nungi mission commander Peggy Whitson aser mission specialists ana- Poland nungi Sawosz Uznanski aser Hungary nungi Tibor Kapu nunger liasü.

ISS nung anentsü lia orbit nungi Shukla-i India nungertem dang "Namaskar" lemsatop.

Ax-4 team nung züngsemtemji anogo 14 shi ISS nung aliba mapang nung Expedition 73 crew den yaritepa scientific experiment 60 dak tali agitsü.

Tamalen Ato kilonser Narendra Modi-i Shukla den Ax-4 crew nem tenüngsang agütsüba den külemi iba mission ya alima nung space tsütsü India jenjang junga akümba temaitsü lir, ta ashi.

Tamalen Science & Technology Minister Jitendra Singh-i, "India nunger space tashi alimai züngshiba atema nüma atanger. Iba ya mezüngpur- Vikram Sarabhai aser Satish Dhawan nunger nem tetushi agütsüba lir," ta metetdakja liasü.

GOVERNMENT OF NAGALAND
POWER DEPARTMENT
NAGALAND : KOHIMA

PWR/NERC-33/17

Dated: Kohima, the June, 2025

ADVERTISEMENT

The Department of Power, Government of Nagaland invites applications for the post of Chairman-cum-Member, Nagaland Electricity Regulatory Commission. The qualification will be as per Section 84(1) of the Electricity Act, 2003 and the term of office and conditions of service of the Chairman-cum-Member will be as per the provisions in Section 89 of the Electricity Act, 2003.

Interested candidates may apply with their detailed bio-data latest by 7th July, 2025 by email (nagaland.dopn@gmail.com) or by Post in the following address:-

Secretary
Department of Power
Nagaland Civil Secretariat
Kohima-797004, Nagaland

Sd/-
(ASANGLA IMTI), IAS
Secretary to the Govt. of Nagaland

No.C-14017/01/2025-Vig
GOVERNMENT OF INDIA
MINISTRY OF HEALTH & FAMILY WELFARE
DEPARTMENT OF HEALTH & FAMILY WELFARE
VIGILANCE DIVISION

Disciplinary maparen inyaktsü asoshi Inquiry Officer shimtsü atema officer-tem tenüng meshir.

Ministry of Health & Family Welfare-i mapa nungi anener alir officer-tem Government of India kübok Ministries/ Departments/ Autonomous Organisations nung Deputy Secretary ser katang mesüra kasa jenjang nung inyakdanga alirtem nungi Ministry of Health & Family Welfare nung mapa junga meinyaker officer-tem anema bushisüngdanga departmental inquiries aotsü atema application meshir.

Application form ji 31.08.2025 anogo tashi nungbo atongtsüsa yangi yoktsü akok - Under Secretary (Vigilance), Ministry of Health & Family Welfare, Room 528-C, Nirman Bhawan, New Delhi - 110011.

Iba mapa asoshi latettsübatem aser tanga temetettsü ajak Ministry of Health & Family Welfare website nung angutsü.

Sd/-
(Manish Kumar)
Under Secretary to the Government of India.

CBC : 17102/11/0002/2526



TIR YIMYIM YIMOBILEM (EDITORIAL)

DIMAPUR FRIDAY, JUNE (AAMI) 27, 2025

Asenokbo aluyimba tajungba

Asen tetsü teboutem aluyimer liasü aser asen nem Tsüngremi lemozüksüba Naga lima, talisa Ao lima, ya aluyimtsü asoshi alushi tajung, tzü mopong tapet aser alu raksatsüsa tüzumetsüng marur aser yiprua maiter, anungji asenoki jungjunga bilemdangra, alima nung inyaktsü akaba mapa tapu aika rongnung asenok nem lemozüksüba mapaji aluyimba mapa ya asütsü. Atangji, asenoki tangar lima nung tangar aluyimertemi tsük lu tulu yima pei peri dang masü saka tanga bendang limatemi yoktettsüsa züsentetba amabo meyimettsüa akok, ajisüaka asenokia asenok peribo tsük lua yimettsü. Ajisüaka, asen lima nung asenoki tajangzük lia yimettsüba luji tsük lu dang masü saka tekong lu nung yimettsüba chiyongtsü aser jenjang aketba süngdonglidong tapu aika lir. Itemji asenoki kanga junga bilemdangtsüla aser koba lu ayimba ajanga asenok perir külenang ano tayoka yoktettsü, item lutemji ayimtsü sentong yanglutsüla. Akhi asen Aor tsüraburtemi tekong nung tsük lu dang yima aru, kechiyong asenok taküm alitsü asoshi chi chiyongba kin, anungji tebok asüngtsü chiyongba chiyongtsütem rongnung asenok asoshi chi tama, iba sülenjiang tanga chiyongtsü jenjang, menjang aser manü aser mendi ta arutsü. Atangji, asenok tsüraburtemi ayimba tsük lu nungbo tsük dang masü saka manü, bonglashi, mapo, züngi, menti aser azüngken luli amala aonsutsü tapu aika külemi züsenteter, anungji tsük maro tsüngda mapo, züngi, menti aser luli nungertemji chia atar aser alu rozüker külen manü aser bonglashi atur. Ano, manü yabo tu agi anüshi aser rübo ama chiyongtsü tapu aika tarutsü anogotem asoshi konga yuteter aser ano mersü lubo chirong nung balaka ayim. Aji oda, asen tsüraburtemi ayimba lu nung yabo chi dang masü saka aonsutsü dena külemi züsenteta aru. Iba ama akhi mapang nungi tekong nung tsük lu yima aruba sobaliba nung asen tsüraburtemi tsük lu dak alaka tanga lu balaka ayimtsübaji meratet südi, ibayongji asen sobaliba nung tsüklu denbo kumba lu ayimba dak alaka tanga lu ayimbabo mangashi. Atangji, tanga lutemji ayimyonga tanü ama tayokdak maka aser ayoktsüa memetet, anungji tsük lu dang yima aruba mapang asen limai kaketshitsü tonga aru aser tsüraburtemi kaketshitsü angazükba nungji tajung reprangtet, anungji kidang kibong nung tasor temang school-i yok. Iba jagi alu inyaktsü nübo mali aküm. Aji oda, kibong rangben chiyongtsü atema tekong lu ayimbaji tsürabur anati dang inyaktsüsa aküm. Iba jagi alu tulu meyimet aser alu tilala ayimba agia tebok mesüngtet, anungji oda oda tekong nung tsük lu ayimba mapa toktsü aser tzülu ayimtsüsa lendena peria malinungji, tsük lu toktsü tanga mapa nung ayangtsü tenzük aser kar government mapai ai. Iba mapang India government-i sen dalam agi relief jang agütsü aser ano tsümartemi asen lima nung dokan lapoka tsümar jang ayoktsü tenzük. Aji oda, tekong nung tsük lu ayimba dang nungibo tanga mapa inyaka dokan nung tsümar jang alia chiyongbajang dalangba aküm. Iba jagi asenoki tekong nung tsük lu ayimba toktsü saka tsük lu melena tanga lu ayimtsübo junga meshisadang, anungji tanü tashi asenoki aaba ajunga agi tsümar jang alia chiyonga taküm alir. Iba tia nungi asenok tajungba küma litettsü asoshi asenok ano khen aluyimba dangi meyiptsü nüngdak, saka tangbo tsük lu masü tanga lu ayimtsü bilemdi. Asenokbo, tanga luji kechi lu ayim nung tajungba asütsü ta shisabolutsü kangabo mali, kechiyong asen li nung manü, züngi, mendi, bonglashi, süngmok, lasüng, mongmong, chiro, somomo aser süngjanglijang tapu ter na den ano jenjang aketba lu süngo, kozü, rubber, süngya aser sandalwood lu ama ayimtsü akok. Item ajakji asen lima nung junger aser tayokdaka lir. Ano, kiset shiruru ak, an, anga aser nashi metsüba mapatem ajunga ya tanübo aluyimba mapa nung aiter aser itemji asenoki kanga junga metsütettsü. Item lutemji takok ngua yimettsü asoshi asenoki aluyimba sentong ana küma yanglur inyaktsüla. Mezüngbuba nung, ita ti-tuku tsüngda züsenteta achiba chiyongtsü lu yima atadang, tanabuba luji küm pungo aser ter sülen sen küma agitsüba lu ayimtsüla. Iba jagi asenok ajak ochishia nümadangteta alitsüsa takar akümtsü., anungji asen lima-a takar lima asütsü.

OLEMSABANG

Naga nunger ya azümesen saka chidiyungdiba kin lir

~ L. Kika Pongener.

Asen Naga nunger libaliroyim ya kanga junga shisadanga bilemdangra, azümesen saka chidiyungdiba kin ka...ta ajatsü akok. Mapabo meinyaknur, saka chiyungtsübo shi/ango (Delicious foods) dang chinuba kin ka lir. Shi/ango medeni chi-pasa khen danga mechiyungnur. Ano suoshi tajung, jenjang tasak (Branded clothes) tapu-tapu melentepa subonuba aser nukshiba kin ka lir. Ano aji dang masü, libaliroba jenjang asadanga, pei jenjang, pei kibong dak malangba jenjang nung libaliroba kin ka lir. Kibongbo sensaker, tilar ka dang, tangar kidang para (rent) agüja alir ka dang sernung...Takar-tulur jenjang nung dang chiyunga-ajemer, suoshi subor aser temaba jenjang (High standard) nung libaliror aser Gari (Vehicle) -bo jenjang tasak (Luxury car) alia amshir...ta asüba kin ka lir. Asen Naga nunger ya takar o sensaker/tulur o tilar na mebendangtetba kin ka lir. Naga lima ya India lima nung sensaktiba State ka asütsü. Atangji, Naga limaji sensaker linük ka, saka nuburtem libaliroba jenjang (Living standard)-bo kanga-sa temaba (High level) jenjang nung litepba linük ka lir. Aji oda, iba ya kong nungi anguba rongsen agi yamai libaliror (?) ta bushidangra, kar dak alaka teimba ka, pei sasa meranga inyakba agi masü, saka ochimashi, mashilen nungi bener aruba rongsen agi, sorkar rongsen aser lokti rongsen alozükba agi, misura karbo ashi-auyaba aser rakzükraktemba rongsen agi kecha tapayu mali laloshiponga jangradema alir asütsü akok.

Asen Naga nunger dak aketba tashimait kaji, tilar-i tulur den aser sensaker-i takar den toktepa linuba, jakla-yimya keta aliba agi asen Naga nunger kibongtem tali sensak atener. Takar-tulur-bo parnok tepok sunga chiyunga-jemer, suoshi subor, taküm jangradema alir, tarutsü atema senotsü aika rizünga yur, tanüngba agi senti-oset taginutsü aika alidena ayur. Ajisuaka, sensaker-tilartemi, takar-tulur chiyunga-ajemba, suoshi suboba aser taküm jangradema aliba jilo benshitsü merangdang, tarutsü atema senotsü rizüngtsübo toktsür, ariana tanü poksunga meperir....Yongji tangar dang sen tetemlok (Interest) agi apotsüsa akümer, aser ibajagi tanem-tanemi kibongji sensak tia ayir. Anungji asen kechi aka, aji agi tenuk sunger, asen jenjang den putepa chiyunga-jemer, suoshi subor, libaliro shia alitsüla. Ajisuaka, kodang asenoki asen tashi dak alia, pei kibong jenjang dang nungi kanga agi temaba jenjang nung alitsü merangdir, meyiper kibongji sensak tia aitsü. Tsüngrem o-i ashir..."Tulur ka ama sayur chiyungtsü makaba dang nungi ; Pei asoshi inyakba tilar kaji tajungba" (A.Shin-12:9). "Nisung kati kecha makai yur, pei sasa takar akümer; Tangar kati rongsen tulu yur, pei sasa sensaker küma sayur" (A.Shin-13:7).

Ano asen Naga nungeri kanga junga meshisadangba kaji...Asenoki anogo ka nung sen kwi bener arur...? Aser asenoki anogo ka nung sen kwi endoker...? Iba tetsüngda ongkoji kanga junga meinyaki libaliror. Asenoki senotsü aah-a bener aruba dang nungi kanga agi talila endokba agi asenok tali sensak atener. Asen Naga nunger dak tashimait kaji, sensaker/tilar kibongtemi takar/tulur akaba aser amshiba osettsüset ajak akatsü/amshitsü meranger....Aser kibong karbo tangar dang sen tetemlok (Interest) agi apor alia amshitsüsa akümer, idangji kibongji tanem-tanemi sensak tia ayir. Asen Naga nungeri taginuba (Wants) aser nungdakba (Needs) ana ya mebendanger. Ajioda, kibong nung osettsüset karbo makayongjia odang litettsüba kar lir...Saka ano karbo maka nungbo melitettsüba-a karbo lir. Anungji anaji bendanga meteta libalirotsü kanga tongtipang lir. Ano asen Naga nunger dak tashimait kaji, lenmang tatsüka, mera ishika aotsü-a tetsüng agi mejajanur, tetsüng agi tatsüka jajabaji jenjang alur, misura maaksu amai bilemer....Saka Gari nung totzü (Petrol/Deisel) shiokba nung senotsü endokba-bo masadanger. Oda tetsüng agia otettsüba lenmang tetsüngda ajak nung Gari bener jajar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung tasüba temerenshi obendang agüja alir Khristan ka chiok



Anwar Kennth tamalen police ket nung lia tangokba noksa nung angur.

June 26, 2025: Pakistan nung Tsüngrem mezüngmeshiba özüng kübok Khristan ka aija tasüba temerenshi obendang agütsüba sülen jail nung küm 23 junger lia June 25 nü Pakistan nung Supreme Court-i, tekolok meshidak kati aibelenba atema temerenshi agütsütsü makok, ta shia pa anema iba ken o agiena tepuokdak nungi chioktsü obendang agütsüogo.

Supreme Court attorney Rana Abdul Hameed-i, Supreme Court bench ka nung justice asem- Justice Athar Minallah, Justice Shahzad Ahmed Khan aser Justice Irfan Saadat Khan nungeri arrshi küm 72 Khristan, Anwar Kenneth anema benoka aliba ken o agien, ta ashi.

Osangbener den jembidang Khristantem atema ken o jembitsür Muslim nunger Hameed-i, "Kanga tain süaka aser tekolok meshidak süaka tesüiba küm 20 dak tali tepuokdak balala nung puoka ayuba ya tia maka tatalokba ka lir," ta ashi.

"Pa tekolok meshidakba nung ajemdaker Supreme Court-i pa chioktsü telemtetba agiba ajanga tesüiba küm aika jail balala nung puoka alir tekolok meshidakertem atema-a lenmang lapoktsütsü ta imlar," ta pai metetdaksü.

K h a t m - e - N a b b u w a t (Finality of Prophethood) Lawyers Forum densema Islamic telok aikati Anwar nem tasüba temerenshi agüjang, ta rongshia liasü, ajisüaka Supreme Court-i telemtetba shidak agiogo, ta Hameed-i ashi.

"Obendangertemi iba obendang agütsüba sülen lawyers aser Muslim nunger lenirtem aikati iba obendang anema nokdaka liasü. Anwar Kenneth chiokba ya parnok atema takoksa tulu, kechiyong Tsüngrem atalaba ken o nung aija alir tangartema chioktsüa akok," ta Hameed-i ashi.

Punjab Fisheries Department nung taoba mapang ketdangser, Anwar Kenneth-i Muslim nunger shisashirtem, Muslim nunger lenirtem aser Pakistan nung bendanger ketdangertem nem shidi ka agüja liasü aser 2001

küm nungi pai United Nations secretary-general aser Khristan Laishirtem dang, Muhammad dang ainkar ajabaji Muslim nunger masüba nisungtemibo magizüker, ta shia liasü; aser ibaji ajanga 2002 küm July ita nung Lahore nung trial court kati pa nem tasüba temerenshi obendang agüja liasü.

Sorkari tentetba medical board kati, Anwar ji tekolok tera meshidak ta kuli agüja liasü ajisüaka Lahore High Court-i maneni 2014 küm nung Anwar Kenneth nem tasüba temerenshi obendang agüja liasü.

Supreme Court nung ken o angadangba mapang nung Anwar atema ken o jembitsür Muslim nunger Hameed-i, "Abraham dak nungi jakzükbayimsü asem rongnung Islam yimsü densema lir. Muslim nungertemi Yisu Khrista densema ainkar ajak dak amanger, ajisüaka Khristantem aser Yihuda nungertemibo Muhammad ya ainkar ta mamanger," ta ashi.

"Tamalen Kenneth-i yimjak nung shidi ka ajanga, Khristan yimsü ajanga Islam majungkettsür ta jembia liasü. Anungji pai ainkar Muhammad anema mejembi, anungji Tsüngrem mezüngmeshiba özüng kübok pa aitsütsü temsüa mali," ta Hameed-i court dang shia liasü.

Yaküm March 12 nü Supreme Court-i linük nung Islamic tentet tuluba- Council of Islamic Ideology (CII) aser Khristan tentet ana- Pakistan Church Council aser United Church Council of Islamabad dang, atangji Anwar-i jembiba orenji Tsüngrem atalaba asü? ta asüngdang liasü.

2023 küm January ita nung Supreme Court bench-i, Anwar Kenneth atema ken o jembitsür ka nüngdaker, ta shia Pakistan Bar Council dang pa atema defense attorney ka agüjang, ta mepishia liasü.

Muslim nunger süaka taoba mapangtem nunga Hameed-i Tsüngrem mezüngmeshiba özüng kübok tai tonglokja aliba Khristantem aika yariogo. Ajioda pai advocacy group Jubilee Campaign Netherlands

teyari agia Anwar atema ken o jembitsütsü melung.

Tamalen osangbenertem den jembidang Kenneth'er kibong züngsemtemi, Kenneth mezüng apuba mapang nung pa ya fisheries department nung Deputy Director teinyakdak liasü, ta ashi.

Kenneth ya shisashir ka aser Khristan tamangtir ka lir.

Yaküm March ita nung osangbenertem den jembidang Kenneth teyi arrshi küm 83, Reshma Bibi-i, "Küno ya Laishir ka liasü aser pai aiben Muslim nunger medemertem den o entepa liasü. Pai mapang shia shidi/ocettem ajanga pa tamang jenjang lemsatepa aru, ajisüaka pai kodanga temeshi nisungtem mezüngmeshi masü. Pai züluba shiditem rongnung shidi ka nung ajemdaker pa ola nembangtsütsü merang," ta metetdakja liasü.

Tesüiba küm aika Pakistan nung Tsüngrem mezüngmeshiba özüng tim mesüi amshia Khristantem nem tai tonglokja arur, aser tatalokba kar nungbo loktii Khristantem tepsetogo.

Olulu tilateri ka nung ajemdaer Muslim nungertemi Khristantem anema apusor.

2024 küm kija nunga Pakistan nung Tsüngrem mezüngmeshiba dak sendakba nung ken o 344 benoka liasü.

Ken o 344 nungjagi shilem 70 bo Muslim nungertem anema benokba, shilem 6 Khristantem, shilem 9 Hindu nungertem aser shilem 14 Ahmadis nunger anema benokba liasü, ta Center for Social Justice (CSJ) indang Annual Human Rights Observer report ajanga metetdaksü.

"Tsüngngrem mezüng meshiba özüngtem tim mesüi hadir ama amshiba ajanga aika reshikangshir aser meimchir temeden anema inyaker," ta kasa report ajanga metetdaksü.

Tesüiba küm 38 tsüngda Pakistan nung Tsüngrem mezüngmeshiba özüng kübok nisung 2,793 nem tai tongloktsü aser loktii nisung 104 bo tepsetogo, ta kasa report ajanga metetdaksü.

ANOGO ABEN TSÜNGREM DEN

Tsüngrem ne den lir

"Ni anema noktakbapur meyrjangsa meyrjang ni metsübur" T.Ken 3:6).

Kodang Assyria chubai Yirusalem amaktsü ta chuba Hezekiahi metet, yimti kümzüksü asoshi chubai yakta dang mapa inyak. Nisungi inyaktettsüba mapa inyaker külen, pai meteta aru, ibai teperi masü. Anungji pai nübur ajak jaten aser iba ama tetsübu agi sünger aliba mapang nung pai ayongzük, "Tashi itang aser pelashishia liang. Assyria chuba asoshi tsübu mesüra aoksa-a teli, mesüra pa den aliba telok ajakji tetsübu, kechiyong pa den aliba dang nungi asenok den aliba tuluba ka lir. Pa den shi nok-o nü lir, saka asen denbo asenok yaritsü aser asen tongpang raratsü Kibuba asen Tsüngrem lir." (2 Puti 32:7-8).

Asenia asen tensa bilemdangdi. Ne tsükchiri na meketbanga lir ma? Kecha teimla maka ama alir asü? Nai makoktsü ama bilema alir asü? Ya bilemtetang- Tsüngrem ne den lir, pa teyari na asoshi.

Nai timtem ajuruyonga, ne kisung dang asüyonga, tetsübu, Kibuba dak ranglokang. Pa dak tamangka-ang aser shiang "Ni anema nokdakba pur meyrjangsa meyrjang ni metsübur".(T. Ken 3:6).

India tesem ajaklen tamangba yimsü meyipba nokdangtsüa akok

June 26, 2025: Tang state tonglokja ken o benoker, aika nung anti conversion Khristantem aser yimsü özüngtem benoka aliba ama temeden atema inyakertem Centre sorkaria tamangba amokmerener.

1967 küm nungi tenzüka Odisha, Uttar Pradesh, Karnataka aser Jharkhand densema state aikati anti-conversion özüngtem benoker aser state kar nungbo iba özüng yanglushia temerenshi tuluba agütsür.

Tang India nung Khristantem anema inyakba tatalokba aika item ama özüng kübok Khristantem nem tai tonglokja inyakba lir.

Khristan teloktem aser legal tsütsü mongintemi, linük nung iba ama tenokdangba benokba ajanga anti-conversion özüngtem tim mesüi amshiba tali bulua akümtsü, ta ashi.

Linük temzüng ajanga senso ajak nem tamangba yimsü temeden agüja lir, anungji linük nung iba ama özüng ka benokbaji linük temzüng alema asütsü aser ibaji ajanga tamangba yimsü telok balala tsüngda melung melemtep tenzüksü, ta parnoki metetdaksü.

Iba özüngji kobi melii Parliament nung benoktsüa akok.

Khristan organisation aikati iba ama özüngji anema nokdaksü aser lokti tentet balala den international observers danga ibaji mita alitsü metetdaksüogo.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tepila

(v) balala, tetsünga ait (difference)

*Asenok o tsümar na tsünga sobaliba tepila talangka lir.

Tepin

(n) poknung nung chiyongsü bendendak shilem (stomach)

* Nashi dak tepin tuluka dena lir.

OLONG PAITEP # 7192

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. Tatsü - (3)
12. Tebur kidong aser zünga kasa tsünga jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7191 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER MA

Danyang-Kunshan Grand Bridge

ALIMA NUNG APU TALANGTIBA 10

1. Danyang-Kunshan Grand Bridge; Beijing-Shanghai High-Speed Railway. Guinness: Longest bridge (any type)- meter: 164,800- China
2. Changhua-Kaohsiung Viaduct; Taiwan High Speed Rail- meter: 157,317- Taiwan
3. Kita-Yaita Viaduct; Tohoku Shinkansen- meter: 114,424- Japan
4. Tianjin Grand Bridge; Beijing-Shanghai High-Speed Railway; Guinness: Second longest bridge (any type)- meter: 113,700- China
5. Cangde Grand Bridge; Beijing-Shanghai High-Speed Railway- meter: 105,881- China
6. Weinan Weihe Grand Bridge; Zhengzhou-Xi'an High-Speed Railway- meter 79,732- China
7. Burapha Withi Expressway; Guinness: Longest Road Bridge- meter: 54,000- Thailand
8. Beijing Grand Bridge; Beijing-Shanghai High-Speed Railway- meter: 48,153- China
9. Dhaka Elevated Expressway- meter: 46,730- Bangladesh
10. Metro Manila Skyway System- meter 39,200- Philippines.

Rukminigaon flyover July 6 nü lapoktsü

Rukminigaon flyover yangluba mapang tangokba noksa angur.

Guwahati, Aami/June 26 (Agencies): Assam Chief Minister Himanta Biswa Sarma-i sangdong ka ajanga, tawa Rukminigaon nung yangluba flyover ya July 6 nü lapoktsütsü, ta metetdaksüogo.

Pai iba osang ya pa indang official X (formerly Twitter) account ajanga metetdakja liasü.

Iba flyover ya lapokba sülen GS Road nung gari senzusenpongtsü mesademi aliba tayongba kümdaktsütsü imlar.

Kasa mapang nung paisa, Brahmaputra anasa tang yanglua aliba trumpet junction

semdang, koba Assam nung Guwahati aser North Guwahati na sendakteptsü asoshi tang yanglua aliba apu den tongtimbang tesendaktep ka asütsü.

Chief Minister-i, iba project inyakyim asadangogo aser ketdangsürtem dang mapa takaratiba nung bener aotsü tetuyuba agütsüogo. Paisa, iba apu ya 2025 küm December ita msüra 2026 küm January ita tashi nungbo yangluzüktsü atema meranga inyakdar, ta ashi.

Sarma-i ashiba agi, apu yangluzükba mapang tashi nung trumpet junction merenemi liaka

Guwahati aser North Guwahati na tsünga gari senzusenpongbo odang tenzütsü.

Iba mapang tsünga garitem ya IIT Guwahati aser GNRC lenmang leni yoka National Highway den sendakteptsü.

Trumpet junction ya 2026 küm May mesüra June ita tembanga yanglutsü imlar, aser iba sülen gari senzusenpong tajungba akümtsü imlar.

Iba tesem semdangba mapang PWD (Roads) Special Commissioner Bibhuti Saikia aser Kamrup Deputy Commissioner Deba Kumar Mishra nung Chief Minister meiner oa liasü.

PM Modi-i July ita Manipur semdangtsü akok

Imphal, Aami/June 26 (Agencies): Ato Kilonser Narendra Modi-i taruba ita (July) Manipur semdangtsü akok. Iba mapang pai Imphal aser Churachandpur na semdanga project renemer alibatem lapoktsütsü aser project tasentem sangdongtsü.

Sources balalai ashiba agi, Imphal West district nung tawa yangluba civil secretariat tasenba Ato Kilonser-i lapoktsütsü aliba atema renemshi tenzüko.

Iba den bendenloksema Churachandpur nung helipad ka yanglu tenzüko aser lenmanga yanglushidar.

Ato Kilonser-i state semdangtsü aliba dak sendakba

nung renemshiba mapang Manipur Chief Secretary P.K. Singh-i tongti shilem agidar. 2023 küm May 3 nü kin ana tsünga mangatettep tenzüko sülen PM-i tang mezügbuba Manipur semdangtsü lir.

Sources-i ashiba agi, project tembanger alibatem aser tasentem atema state sorkar kübok department balala nungi Centre-i report benden tenzüko. Ajisüaka Ato Kilonser-i koba anogo Manipur semdangtsü iba indang osang tejangja memetet.

Ato Kilonser-i tatemsa Manipur ya 2019 küm Janury 4 nü semdanga liasü. Narendra Modi-i Manipur ken o ya 2024 küm July 3 nü Rajya Sabha nung

benoka jembi aser iba mapang ashiba agi, Manipur nung azütokshi lendong tanem tanemi tajemba küma odar aser tensa azüoktsü atema maneni inyakdar ta metetdaksü.

Pai, opposition dang politics sentoka toktsür state nung yimjung bener arutsü atema sorkar den teka amteper inyaktsü mepeshia liasü.

Manipur nung mepetmesü tenzüko sülen nisung 260 dak tema süogo aser nisung 58,000 tang tashi state kübok relief camp balala nung lidar.

Mangatettep adoker aliba ajanga Meitei nungertem state nung sabanger lir, kechiyong Kuki-Zo nungertemi National Highway tem shibanga yua lir.

Manipur Police-i Loktak nung KCP (PWG) camp ka bentsü

Imphal, Aami/June 26 (Agencies): Manipur kübok Loktak Lake nung tzüma nung apongdkaliba semtu ka nung telungpurtemi mesemteper aliba transit camp den repsema tejenokdak ka bentsüogo.

Kangleipak Communist Party (People's War Group), KCP (PWG) nungi züngsem ka apuba sülen iba jenjang agia liasü, ta police-i Brehostibarnü ashi.

Itangitertem nungi, tzüma nung apongdkaliba semtutem ya telungpurtemi parnok jenokdak aser transit camp ama amshir ta osang angazükba sülen central aser Manipur police team kati Loktak Lake

nung temulung melemi bilemba tesemtem longbanger meita oa liasü.

Meita aoba mapang KCP (PWG) züngsem ka apu. Telungpursang ya Mutum Manaocha Singh @ Khullakpa (44) ta jangjaogo, shiba Bishnupur district kübok Tronglaobi Makha Leikai nung alir.

Bishnupur district nung Keibul Lamjao police station kübok Karang anasa Champo Khangpok nung tzüma nung apongdkaliba semtutem rongnung ka nungi police temi pa apu aser prangbong injang aser hadir balala nguteta liasü.

Meita aoba mapang police

temi 9 mm pistol ka den magazine ka aser 9 mm injang ana nguteta liasü.

Semtutem meita aoba mapang tabentsü sü, gas stove ka, table fan ka, pressure cooker ka, auso aser tanga tenüngdakba osettem ngutetogo, koba telungpurtemi amshi asütsü ta bilemer. Iba semtu ya-a bentsüogo.

Sepaitemi apuba telungpursang yagi osang agütsüba dak ajemdaker ano kasa district nung Nachou Awang Leikai tesem meita aoba mapang SMG carbines ana den magazine ana, MA-1 rifle ka den magazine asem aser 5.56 mm indang injang semerka ngutet liasü.

Netanyahu anema ken o benoka aliba agientsüla: Donald Trump



Washington, Aami/June 26 (Agencies): United States Tir Donald Trump-i Israel dang Ato Kilonser Benjamin Netanyahu anema ochimashi mapa inyak ta ken o benoka aliba agientsü mesüra tatok agütsütsü ayongzük aser Israel lenir anema ken o benokba ya "witch-hunt" lir ta ashi.

Trump-i iba tayongzükba ya Bodhbarnü par Israel tembar tenüng nung agütsü, shiba sübokrem amshiba, ashikülak mapa inyakba aser linüki tamang makatettsüsa inyakyim ta tai tonglokja 2019 küm ken o benoka liasü.

"Bibi Netanyahu indang ken o TANGSA, AGIENTSÜLA, mesüra Great Hero nem tatok agütsütsüla, shibai State (of Israel) asoshi mapa jenti inyakogo," ta Trump-i pa indang Truth Social sapang nung Israel lenir dang ajaba tenüng amshia ashi aser Netanyahu ya Hombarnü okadak nokdaksü lir ta angazük ta ashi.

"Linük asoshi mapa jenti inyaker ka asoshi ibai WITCH HUNT lir aser ni atemabo bilemdangtsü makok," ta

Trump-i ashi.

Netanyahu indang ken o ya 2020 nung tenzük aser criminal cases asem lir. Pai item tai tongloktsüba magizüker aibelena mali ta ashir.

Israeli media ajanga ashiba agi, Netanyahu indang cross-examination ya June 3 nü Tel Aviv court nung tenzük aser tembangtsü küm ka shi agitsü imlar.

Netanyahu nem tatok agütsütsü Israel Tir Isaac Herzog dak tashi lir, saka pa nem tatok agütsütsü indang tangbo mejembir, ta osangtem ajanga ashir.

Tatok agütsü atema pa dangi ken o kecha maru ta Herzog-i shiogo, ta osangtem ajanga ashir.

Trump-i pa indang post nungsa, "United States of America-i Israel kumzük, aser tang United States of America-i Bibi Netanyahu kumzüktsü," ta shia liasü.

Netanyahu indang ochimashi ken o soittsü atema Trump mesüra US sorkari kechi inyaksüar mejangja.

Trump-i Netanyahu

bhukumba ya Israel-i ceasefire sülen Iran amakba mechi pai Mongulbarnü yimjak nung Israel lenir artsüba den meputeper.

"Onoki deal yangluba den külemi Israel-i bombs aika tsükdaktsü, aser iba ama inyakba ni kodanga mongudang. Asen tenük agi anguba bomb timtiba. Ni Israel dang mepelar," ta iba mapang Trump-i osangbener dang shia liasü.

Trump-i ashiba ya Netanyahu indang allies kari pela agizük, saka Israel opposition lenir Yair Lapid-ibo bendanger tzüzüng-ozüng nung US tiri teka mesangshitsüla ta ashi.

"Teti akum agüja aliba Trump, pai independent linük ka nung ozüng inyakyim nung teka mesangshitsüla," ta pai Ynet dang ashi.

Trump-i ayongzükba ya Netanyahu dang "compensation" amai lir kechiaser pai Gaza ken o nunga rara tembangtsü ajungshitsü. Ibaji Trump yimya lir, ta Lapid-i ashi.

Netanyahu indang Likud Party nung züngsem Ariel Kellner-ia Trump-i ochimashi ken o agientsü ayongzükba aitsü.

Ajisüaka National Security Minister Itamar Ben-Gvir-ibo Trump-i ashibaji shidak ta bhukuma liasü.

"Israel ya independent aser sovereign state ka lir, saka Tir Trump ya shidak - judicial system nung tekeraba nung temelenshi alitsüla!" ta pai X nung post asü.

Israel-i Gaza nung nisung 21 tepset

Cairo, Aami/June 26 (Agencies): Israel-i prangbong aser tayimtsü amshia Brehostibarnü Gaza Strip amakba nung Palestine nunger 21 tepset, ta yangji aliba health ketdangsür temi ashi aser linük ana tsüngtai ia yimjung ken o jembir temi Israel aser Hamas dang rara tembangtsü asoshi ceasefire ken o jembir tenzükshitsü ashir.

Gaza City kübok Sheikh Radwan suburb nung tesem balala nungi arua jenoka aliba school ka nung Israel-i tayimtsü amshia amakdang nisung toku tepset, aser ano linük south tsütsü Khan Younis nung tent encampment ka anasa amakba nunga nisung toku tepset, ta yangji aliba health ketdangsür temi ashi.

Central Gaza nung tongti lenmang nung UN aid trucks ata aliba nisung telok ka dak Israel-i injang khaloktsüba nung nisung asem tepset aser aika

yiru, ta medics temi ashir, koba teyari agütsüba tesem nung nisung jenti tepseta aruba nung tesüsaba alitsü.

Brehostibarnü atalokba atema Israel mitkar nungi sangdong kecha agüja mali. Israel-i Hamas nungi telungpur tem samatsütsü bushir ta ashir, shirnoki 2023 küm tatemlen Gaza nungi southern Israel maka liasü.

United States-i yaria Arab lima nungi Egypt aser Qatar ajanga ceasefire atema jembishinü tenzükdaktsütsü asoshi rara nung aliba telok anaprong den jembiba mapang tang asüba osang tasen ya angashir, ajisüaka jembishinü tasen tenzüktsü atema mapang tejangja lateta mali ta Hamas osang ajanga ashir.

Far-right party tem den coalition anir alisang Israel AtoKilonser Benjamin Netanyahu-i küm 20 jungnüa Gaza nung yimsü süa aruba

Hamas dang rara tembangtsü asoshi pua alir ajak chioktsü, shilem kecha magitsü aser nok-nü yutsütsü ashir.

Külen Hamas-i Israel dang permanent ceasefire alitsü mulunga Gaza nungi parnok ainshira, pua alir ajak chioktsü ta ashir. Hamas-i Gaza nung yimsü mesütettsü ta tejangja angatetaka parnoki nok-nü yutsütsü indang jembishinü asütsü memulunger. Hamas-i aniba telungpuri October 7, 2023 nü Israel amakdang nisung 1,200 shi tepset aser 251 pua bener ao ta Israel-i ashir.

Iba tayang kepzüka Israel-i raraba nung Palestine nunger 56,000 dak tema tepsetogo, ta Gaza nung health ketdangsür temi ashir.

Tang tashinung chioka aliba hostages ya timba Hamas aser Israel tsüngtai dangar aita jembishinüba sülen chiokba lir.

MULUNG NEN O

"Pai temulungjang teraksa aneptsür, aser parnok zübu alentsür." Tenungsang Ken 147:3



Aso: 10-09-1982
Asü : 24-06-2025

Onoki teti meima aliba **Asür I. LANUAKUM IMCHEN (Lakhuni)** H/o Mrs. Estherla, shirangba mapang aser 24-06-2025 nü akumli wadang temer onok mulung zürepa aser mangyima aliba mapang ozü den nübu aser sarasadem agi yaritepba kija, lokti, arogo, medemer aser kidanger shirnokisa yaritepogo, nenok ajak dang ozüi pelaba lemsateper.

Ner mapa aser sarasadem ajanga ozü teimla makai tesama tia nung alidang kanga yariogo.

Nenok kija shia dang ozü tepela melemsatetba asoshi kanga sasar, saka asen Tulusang Tsüngremi nenok ajunga mulamushia mojang ta onoki sarasademtsür.

~ Temeim kinungtsü, chirnur, adianu, tsürabor, anük-apang aser kinungertem.

Iran-i US matsüngdang mapudaktsü: Khamenei



Tehran, Aami/June 26 (Agencies): Israel den ceasefire tenzüker mezüngbuba jembidang, Iran-i United States matsüngdang "kodanga surrender masütsü", ta Iran indang Supreme Leader Ayatollah Ali Khamenei-i ashi.

"America tiri sangdong ka nung Iran-i surrender asütsüla ta shia lir. Surrender! Ibai enrichment mesüra nuclear industry asoshi masü, saka Iran surrender asütsü atema. Iba ama (surrender) kodanga mataloktsü. Ibai kodanga mataloktsü," ta Khamenei-i sangdong ka nung ashiba state media ajanga Brehostibarnü television nung sayu.

Iran aser Israel tsüngta anogo 12 rara aliba ceasefire ka ajanga anener anogo ana lir Khamenei-i iba o ya ashi aser June 19 sülen tang mezüngbuba yimjak nung temai adoker alitsü.

Iba rara mapang US-i Iran nunger tongtipang nuclear sites Fordow, Natanz aser Isfahan amakdang raksatsüba tsütsü US nung opang meputepi alidang pai iba o ya jembia liasü. US Tir Donald Trump-i nuclear facilities tem samatsüogo ta ashir.

Ajisüaka Khamenei-ibo Trump-i o tali saloka jembir aser iba rara nungi US tajangzük kecha mangu aser US-i amakba nunga Iran indang nuclear facilities balaka raksatsüba mali ta ashi.

"Islamic republic-i kokogo, aser tayang kepzüka America

nunger tejak nung kanga sashia ama," ta pai Iran indang missile amshia Qatar nung US base amakba athishia ashi, koba Middle East nung tulutiba lir.

Iranian army-i takok ngua military aser non-military positions amak aser Israel nung teraksa tulu agütsü ta Khamenei-i ashi aser "Israel-i asenok dak ano makra, parnoki ano teraksa tali angutsü," ta ashi.

Khamenei-i jembidang mitkar-i Israel mesüra America amokmeren masü, saka par linük indang nuclear sentong shidak lir ta ashi.

Tesem timba shidak lir aser Iran-i nuclear sentong maneni inyaksü, ta Khamenei-i ashi.

Anogo 12 raraba nung Israel-ia takok nguogo ta ashir aser Iran-ia takok nguogo ta ashir. Israel Ato Kilonser Benjamin Netanyahu-i Mongulbarnü sangdong ka nung Israel asoshi otsüsütsü takok nguogo ta tenüng sanga liasü.

Kasa mapang Iran-i Washington den nuclear ken o maneni jembitsü mulunga lir ta ashi.

Israel-i Iran nung amakdang civilian 627 asü ta Tehran indang health ministry ajanga ashir aser Iran-i Israel amakba nung nisung 28 tepsetba kuli balala ajanga sayur.

Iba rara nung tepsetba commander aser nuclear scientists asoshi asüpila sentong Honibarnü Tehran nung agitsü.

AFC Futsal Asian Cup 2026 Qualifiers nung India Group A nung ata lir

Aami/June 26, 2025 (Agencies): AFC Futsal Asian Cup Indonesia 2026 qualifiers atema India team Group A nung hosts Kuwait, Australia, aser Mongolia den ata lir. Iba asayamung atema draw ya Brehostibarnü AFC House nung süa liasü.

Tang mezüngbuba draw ya FIFA Futsal rankings dak ajemdaker agi aser team 31 telok ti kuma lemsaogo. Telok tetet nung team pezüzü aser telok ka nung team asem lir.

Telok tiprongla nungi takokertem aser runners-up tajungtiba tenet hosts Indonesia den külemi 18buba AFC Futsal Asian Cup asayatsü, koba taruba küm January 27 nungi February 7 tashi asayatsü lir.

India team world rankings nung tang jenjang 135buba nung lir aser parnok tang agi tanabenbuba AFC Futsal Asian Cup atema qualifying asayatsü. 2023 küm parnok qualifying

asaya asemprongla nung tamakok ngua liasü.

Group A nung India den asayatsü aliba team tem rongnung Kuwait FIFA rankings nung jenjang 40, Australia 52 aser Mongolia 112buba nung lir. Qualifiers ya September 20 nungi 24 tashi Kuwait City nung asayatsü.

Top seeds Thailand team Group B nung Korea Republic, Bahrain, aser Brunei Darussalam den ata lir. Iba asayamung pezüben tashi koker aliba Japan team Group C nung hosts Tajikistan, Macau, aser Cambodia den asayatsü. Group D nung Iraq, hosts Saudi Arabia, Chinese Taipei, aser Pakistan lir.

Group E, Vietnam, Lebanon, hosts China PR, aser Hong Kong, China nungertokteptsü aser Group F nung Uzbekistan, hosts Kyrgyz Republic, Timor-Leste, aser Palestine lir.

Defending champions aser iba asayamung 13 ben koker aliba Iran team Group G nung Malaysia (hosts), UAE, aser Bangladesh den asayatsü aser Group H nung Afghanistan, hosts Myanmar, aser Maldives lir.

AFC Futsal Asian Cup Indonesia 2026 Qualifiers Draw:

Group A: Kuwait (H), Australia, Mongolia, India.

Group B: Thailand (H), Korea Republic, Bahrain, Brunei Darussalam.

Group C: Japan, Tajikistan (H), Macau, Cambodia.

Group D: Iraq, Saudi Arabia (H), Chinese Taipei, Pakistan.

Group E: Vietnam, Lebanon, China PR (H), Hong Kong China.

Group F: Uzbekistan, Kyrgyz Republic (H), Timor-Leste, Palestine

Group H: Afghanistan, Myanmar (H), Maldives.

Norgaard alizüktsü atema Arsenal-i mulunga agizükogo

Aami/June 26, 2025 (Agencies): Midfielder Christian Norgaard alizüktsü atema Arsenal-i Brentford den tenangzüktepba ka yanglutsü mulunga agizükogo.

Sources balalai ashiba agi, Arsenal puri pa atema pound million 10 aser iba den performance dak sendakba nung add-ons pound million 5 agütsütsü atema sensaksemdar.

Thomas Partey indang contract tembangtsü hopta ka dang lia Norgaard alizüktsü atema jenjang agidar.

Ghana nung international asayar Partey (32) aser club na pa maneni asayatsü atema tenangzüktepba ka yanglutsü sensaksemdar, saka tang tashi tenangzüktepba meyanglui lir.

Osang ajanga ashiba agi, Partey melentsü atema Arsenal puri Sevilla nungi France nung arishi küm 23 tain midfielder Lucien Agoume-a asadangdar.

Ajisüaka manager Mikel Arteta-i, Norgaard ang alizükner ta angateter, kechiyong pai Premier League nung asayatsü renema aliba asayarang ka aginer.

Denmark nung

international asayar atema club o club na sensaksem taoba ghonda 24 tsüngda taliba kümogo aser tenangzüktepba ka yanglutsü ana nung lir.

Arishi küm 31 tain asayar shiba 2019 küm Fiorentina nungi Brentford nung dena liasü, pa den tenangzüktepba tembanga meyanglu tsüngda medical tetendangba agitsü.

Norgaard ya Arsenal puri mapang talangka nungi repranga aliba asayar ka masü, saka Partey-i club toktsür aotsü akok ta bilemba mapang ka nung tajangshiba peria bener aliba asayar ka bushiba mapang pa-a club-i asadang tenzüka liasü.

Thomas Frank kübok Norgaard ya Brentford atema tongtibang asayar ka aküm aser pa team captain liasü.

Kasa mapang nung Arsenal puri Chelsea goalkeeper Kepa Arrizabalaga atema release clause pound million 5 aliba agütsür pa den tenangzüktepba ka iba hopta yanglutsü imlar aser Real Sociedad midfielder Martin Zubimendi pound million 51 agi alizüktsü atema ken o tembanga jembishinütsü ana nung lir.

Rassie van der Dussen South Africa T20I team captain kümogo



Aami/June 26, 2025 (Agencies): South Africa-i, Zimbabwe aser New Zealand na den tri-series asayatsü aliba atema T20I captain asütsü Rassie van der Dussen shimogo, shibai tang tashi nung T20 Internationals 50 asayar lir.

Iba asayamung atema team sangdongba nung tang linük tenüng nungi mezüngbuba asayatsü aliba asayar pezü; Corbin Bosch, Lhuan-dre Pretorius, Rubin Hermann, aser Senuran Muthusamy lir. Iba asayamung ya Harare nung July 14 nungi 26 tashi asayatsü.

Domestic cricket asaya aser talisa SA20 tournament nung kanga junga asayaba sülen item asayar tasentem team nung shimokogo.

2025 SA20 nung Pretorius-i kanga junga asaya-a pai run

397 yanglu aser pa indang strike rate 166 liasü. Iba asayamung nung pai run timtiba yanglua liasü.

Wicketkeeper-batsman Rubin Hermann-ia, 41.43 average nung run 333 yanglua liasü.

Bosch, shiba taoba mapang SA tenüng nungi ODIs aser Tests nung asayaogo, pai MI Cape Town puri taküm SA20 akokba nung teyari tulu agütsü aser Muthusamy-i team nung spin ball aonba den batting nunga teyari agütsütsü.

South Africa tebur team head coach Shukri Conrad-i, Zimbabwe aser New Zealand na den taruba T20 International (T20I) tri-series atema asayar 14 shimba sangdongogo.

Team nung Dewald Brevis, Nandre Burger, aser Gerald

Coetzee nungera züngoksemogo, shirnok yirur aliba tajungba kümogo aser Lungi Ngidi aser fast bowler Kwen Maphaka nata team nung dena lir.

"Workload management nung shilem ka ama asayar tejentem ishika anisüngzüdaktsüba ajanga tangar asayartem nem parnok sempet sayutsü atema maongka agütsür," ta head coach Shukri Conrad-i ashi, shiba all-format coach akümba sülen tang mezüngbuba pa lenisüba nung T20I asayamung ka asayatsü lir.

"Item asayartem yagi international jenjang nung koma asayateter aji reprangtsü asoshi maongka tajung lir," ta paisa shisem.

Team ya Pretoria nung July 9 nü nungi tenzüka anogo ana atema camp ka akatsü aser iba sülen July 11 nü Harare-i aotsü.

Iba asayamung ya South Africa team atema 2026 ICC Men's T20 World Cup asoshi renemshi tetenzüker asütsü.

Squad: Rassie van der Dussen as captain, along with Corbin Bosch, Dewald Brevis, Nandre Burger, Gerald Coetzee, Reeza Hendricks, Rubin Hermann, George Linde, Kwen Maphaka, Senuran Muthusamy, Lungi Ngidi, Nqaba Peter, Lhuan-dre Pretorius, aser Andile Simelane.

Liverpool-i Bournemouth nungi defender Kerkez alizükogo


Aami/June 26, 2025 (Agencies): Liverpool-i Hungary nung left back Milos Kerkez, Bournemouth nungi alizükogo, ta Premier League champions yagi Brehostibarnü sangdong ka ajanga metetdaksü.

Liverpool-i arishi küm 21 tain asayar atema pound million 40 agütsütsü mulunga agizükogo, aser pa den küm pongu atema tenangzüktepba ka yangluogo.

Tang transfer window nung midfielder Florian Wirtz aser wing-back Jeremie Frimpong na Bayer Leverkusen nungi alizükba sülen parnoki Kerkez alizükogo.

"Alima nung club tulutiba rongnung ka aser England nung club tulutiba nungi asayatsü ya kü atema maongka aser tetushi tulu lir. Ni kanga pelar," ta Kerkez-i ashiba club sangdong ka ajanga metetdaksü.

"Ni kidangi meyipa oa ozü yimti nung anogo ishika jangradema mapang intoktsü. Ni training kit semer taruba



season atema training agia renemshi tenzüksü matateter," ta pai ashi.

Bournemouth nung season ana tashi kanga junga asayaba sülen Kerkez Liverpool nung denogo. Pa Bournemouth nungi 74 ben asaya liasü.

Kerkez ya Serbia nung asoba asayar ka, saka pa Hungary tenüng nungi asayar aser tang tashi nung 23 ben asayar lir. Pa linük tenüng nungi international jenjang nung mezüngbuba 2022 küm Germany den asaya liasü.

BILEMDANGANG

**"Aremzüka inyakertemi takok
tajung nguteter."**